

知
足
齋
文
集

年譜卷中

乾隆四十九年甲辰

府君五十四歲正月與重華宮茶宴以五經萃
室聯句和詩拜賞以日講官扈從

南巡進

六巡江浙恭紀詩七言古體一百韻至清江浦授內閣
學士兼禮部侍郎至杭州奉命闕召試浙江福
建諸生卷得士浙江四人今任福建巡撫歸安張
君師誠給事中費君錫章內閣侍讀山陰何君金
兵部郎中錢塘姚君祖同又二等吳君純等二十

一人至江寧復奉 命闕召試江蘇安徽江西諸
生卷得士江蘇九人安徽五人江西二人今山西
布政使欽縣金君應琦掌河南道御史鮑君勳燕
禮部郎中雲南學政南豐譚君光祥兵部郎中江
陰繆君心泰刑部員外郎太倉汪君彥博吏部員
外郎欽縣程君振甲內閣中書武進劉君召揚甘
泉黃君文輝潞安府知府桐城張君曾獻其尤著
者又二等周君愛蓮等三十七人繆君善寫真爲
府君作梅石觀生圖

今上在書房時賜題五古一首藏于家 殿試充讀卷

官一甲三人今少詹事會稽茹君棻編修餘姚邵君瑛編修天津邵君玉清十月充武會試總裁官副者翰林院侍讀學士上海曹公仁虎得士李錫命等四十八人李後死兵事入祀昭忠祠是年十弟錫珏卒歲除分、賞福字

乾隆五十年乙巳

府君五十五歲正月和

御製千叟宴詩元韻三伯父以封翰林學士與千叟宴列四品坐殿上拜賞十六件府君侍班蒙

上垂詢時 肇建辟雍釋奠講學禮成恭進雅詩八章奉

派閱 大考翰詹卷夏五月扈

澤熱河和詩十首八月隨往木蘭進哨九月還京歲除分
賞福字

乾隆五十一年丙午

府君五十六歲春正月與 重華宮茶宴以五福

五代堂聯句和詩拜 賜二月 授禮部右侍郎

六月奉 命主江南鄉試副者編修大庾戴公心

亨得士張肇瑛等百十四人二十年來成進士者

幾半經術通者阮中丞元汪太僕廷珍孫觀察星

衍張編修惠言韓大令廷秀李太守賡芸馬進士

崇璉石大令渠闕莊廣文偕甲幾二十八副榜
十二人吳庶子鼐鮑侍講桂星與焉又同子已未
成進士再出府君門是年春與彭文勤偶集公署
文勤曰公今年必典江南試若能得歛方槩江都
注中者吾輩服矣蓋方能爲清微元妙之文不易
識注則不工爲時文其學通雅精確爲江淮學者
冠府君遍閱卷萬二千本自謂能盡江南之選而
心揣未得兩人浹月不懌後知兩君皆未入場汪
君以明經睥睨公卿傲視科目然聞府君求得其
卷感不已書來願爲弟子孫君通小學五伯父聞

其名常與府君言之其首場三藝皆宗古注搜落
卷得之曰此必孫某也後庚戌會試得洪君亮吉
卷亦然府君與兩君皆無一面也八月 命督浙
江學十月抵杭州業師吳夔潭先生之孫聚來謁
云三世未葬乃亟謀于顧河干先生爲買地一區
明年十月燕先生者及妻子婦凡七棺于西湖
神駕雷院之西

乾隆五十二年丁未

府君五十七歲四月頒到千叟宴詩 皇極殿燈
聯詞墨刻時晴齋法帖五月轉禮部左侍郎俱具

摺謝七月 奏考試情形畧云春間試寧波紹興
夏試嚴州金華衢州文武事竣還省查浙東文風
寧紹較優金華次之衢嚴又次之武藝衢較勝各
屬士子讀書務實固有其人而浮薄澆競亦所不
免臣于詣學時愷切誥誥竝飭學官嚴密查報生
員訐訟及被人控告有據者斥革註劣示懲務期
士風各敦淳樸去莠旌良報 聞浙俗以領貧生
銀爲恥歲暮則多向當事乞貸按試初卽出示告
多士貧生不足恥于當道大可恥後復于貧生中
拔海寧州一人台州府一人貢之太學自是士習

一變歲試淳安有東玉十五號卷招覆不到問之
曰項菁死矣爲墮淚作詩吊之凡年家故舊子弟
與考者引與而試立評其文不少假借佳者與選
不能者飯而遣之曰吾不能以私害公也杭州學
租較豐給貧生外有羨餘府君不侵一錢遇歲科
試以前列者送省會敷文崇文紫陽三書院中肄
業以此爲膏火

乾隆五十三年戊申

府君五十八歲正月二日作詩自警竝以廣同人
自謂行年五十有八精力漸不如前聰明日減了

昔恐行已應物間必有不能周詳而盡道者矣二月、奏上年七月考杭州由湖而嘉而台而溫而處歲試全竣封策旋省查杭嘉湖文風較優但詞華多而根柢少臣教以重經義敦實行溫台山海之區秀愚相間處州僻在山陬稍爲固陋臣勸以讀書學古頗知向方大縣應經解古學者百餘人小亦數十臣嚴搜扁覆期得真材報 聞頒到

御筆仿李迪雞雉待飼圖墨刻

御製勦滅臺灣逆賊生擒林爽文紀事語

御製福康安奏報生擒莊大田紀事語墨刻俱具摺謝是

時臺灣平定紅旗報捷具摺恭賀八月調吏部右侍郎頒到

御批通鑑輯覽

御製平定臺灣告成熱河 文廟碑文

御製平定臺灣二十功臣像贊序次第具摺謝上年己酉爲 恩科鄉試本年爲正科秋前已舉拔萃科乃加副貢凡新科選拔生員登鄉舉則以副易之是科如朱主事涿等雋者已數人又向來撥府學者多以選中中下之材府君謂府學廩缺多十二年舉拔萃者郡額倍于州縣凡撥府學必以其尤

乾隆五十四年己酉

府君五十九歲四月朱秬堂先生之子鼎以先生所撰樂府正義全本來爲分十五卷授之梓秋會考拔貢生得人最盛如姚殿撰文田姚中翰學瑛王觀察紹蘭蘇員外琳戴主事聰胡主事枚等以宿學次第舉鄉會試者二三十人本年獲舉鄉試者優拔貢生共十九人彙奏時竝上 聞錢塘仁和同時第一名入學者汪潤之胡敬汪中本年本省解元胡中嘉慶乙丑會元姚蘇戴成進士皆府君爲總裁其餘科歲試前列者中甲乙科殆盡八

月作圭田記略云自先資政公初置祭田二畝六分有奇乾隆癸未某司閩臬暨壬寅視學于閩先後二十年續置田二十三畝有贏未及圭田之半也歲丙午典試江南復拜浙江學政之命具摺

陳明祖籍奉

硃批一切勉爲之欽此跪讀

恩旨感惕泚晷乃盟心曰若不倍常敬慎負

君恩而辱祖宗不可爲人矣丁未戊申春歲科兩試紹郡竣及今年夏由台州旋過蕭蓋三拜掃于越寨及黃閣河西山之祖墓三年中增置祭田竝姪錫彤

寄買者前後約七十餘畝矣於是以二畝八分有奇歸于越寨以二十畝爲祀墓田而以五十餘畝屬之宗祠竊取圭田之遺後數年續置田三十餘畝其成百畝又作公田記取宋儒朱子說詩謂公卿有田祿者力農事以奉其宗廟之祭祀則有公田蓋古者潔其祿入分君惠而波及甿獨之意也府君自是與族人益習凡宦遊所至暨還京師歲必有數十輩來秀者教之學貧者衣食之資之歸歸則復來來者日多值窘中羣譟于庭徐如其意以去或云此輩未必真族人直爲所給耳府君不

厭不悔也卒後尙有五人留京師皆已給歸資蕩
費盡不能行錫經遵遺命爲治裝去十月回京復
命充 經筵講官十二月二十七日

御書大福字于 乾清宮面拜 賜蒙 詢年齒以新歲

六十對有句云昔會分得五雲箋今日親承 御

座前 清問加齡花甲始春開受福吉庚年是秋

錫經生子雲保府君歸見之甚喜數月殤

乾隆五十五年庚戌

府君六十歲正月與 重華宮茶宴以八徵耄念

之寶聯句和詩拜 賜二月舉行 經筵

命府君進講時 諸皇子侍班聽講

高宗純皇帝顧

今上曰此汝師傅講得好三月初六日 命與大學士

韓城王文端公杰禮部侍郎無錫鄒公奕孝充會
試總裁官得士朱文瀚等一百二人榜發海內知
名之士皆在選中士論翕然恭值

八旬萬壽府君進九敘一篇請將本身妻室 封典賜贈
胞伯父文炯榮祿大夫經筵講官吏部右侍郎加
一級伯母陳贈一品夫人秋七月奉

旨授安撫巡撫去年冬四川總督李公世傑病

上命軍機大臣兵部尚書孫公士毅往代之孫乞留京供職

上曰朕無人可用汝謂誰勝此任者對曰臣願保一人以代

上問誰對曰朱珪

上愕然曰侍郎朱珪耶對曰是

上曰朱珪何以克當此任對曰朱珪操守好辦事好小用之則小效大用之則大效

皇上以封疆畀之可以無煩

聖慮矣

上曰伊甫擢侍郎止可爲巡撫耳今春府君 召對

上歷詢在外任及改京職時事

上曰汝不願外任朕亦知之有人爲朕言之對曰臣才識不能開展難勝外任

上曰汝不願耳朕已用汝爲侍郎矣免冠謝

上謂軍機大臣云朱珪人品正學問優資格亦深可用爲尙書矣孫士毅薦爲四川總督似太驟耳至是乃有是命謂軍機大臣曰朕今日所擢得人府君馳赴熱河謝

恩 召對奏云臣才識迂拘難勝封疆之任

上曰汝曾任兩司刑名錢穀皆所熟諳有何不能辦之事

朕信得及汝不做壞事至于才情不開展安徽巡撫亦無所用才情叩謝出 賜克食時將率安徽屬員隨班
恭祝 慶典 陛辭尚須時日扈 蹕還京中途
得

旨以隨從人太多分遣先回二十八日抵家戌刻接五百
里 廷寄奉

上諭周樽兩次奏到宿州濉河等處連日雨水較多河流
陡長西北兩鄉因上游黃水會歸下注情形較爲漲盛
村庄堤埝不無淹浸廬舍田禾間有損壞朱珪著卽日
由京馳驛速赴安徽親往宿州察看水勢逐一勘明加

意撫卹不可稍存諱飾欽此次日拜摺辭卽東裝馳驛
前往奉

硃批一切勉爲救濟不可諱災欽此尋 奏八月十二日

乘船至宿州西北接碭山東南至靈璧一百六十
里一望汪洋現在水已落二三尺深者尚五六尺
丈餘不等露處棚棲纍纍相望仰蒙 恩賞一月
口糧卽督率分給其堤埝嚴催趕築旋赴靈璧查
辦再開泗州五河有被水處擬繞道履勘再奏府
君自奉儉約秉節所至恐爲官民累加意防檢此
次以本省巡撫兼 欽使查荒自都攜僕五人及

河舟不具與村人同渡舡比渡驛無馬接應一弁
策蹇來迓卽前導府君方憫河患之大婉辭之不
訶也十七日接印奉

諭旨令將堤埝築有幾成積水會否一律消退涸出田畝
尚可不悞春種之處迅速覆奏以慰厯注通計幾分收
成速奏來欽此尋 奏查濰河趙家庄缺口二十三丈
已築十二丈于北岸開引河洩溜李泰庄缺口三
十丈已築十三丈小趙家口漫缺十餘丈現購料
趕修統計築有七成積水比前又減數尺九月內
可全消南方凍遲融早及時翻犁不悞春耕以豐

準歉收成仍在八分以上臣在靈璧督放口糧後
赴五河查沱澮濼淮交匯之所受水者三十三
鄉盱眙五十九堡一體給賑二十六日抵鳳陽將
十里程小東關等共廿三處窪地量給借口糧籽
種奉

硃批覽奏稍慰欽此九月又 奏覆勸懷遠鳳臺壽州窪
地被水者共五十一村四十五保請于冬令春前
酌借口糧一月涸出地畝酌借籽種奉

硃批覽奏稍慰欽此又 奏秋收分數通省約八分有餘
奉

硃批覽之欣慰欽此頒到

萬壽衢歌樂章一部具摺謝又 奏年終彙奏之件如

換帖宴會及門包押席承值筵席等事奉

硃批以實爲之諒汝無此欽此十月頒到

御筆觀張照草書韓愈石鼓歌詩墨刻竝張照草書墨刻

各一分

御製集石鼓文十章製鼓重刻序

欽定重排石鼓文竝石鼓墨刻

御製涇清渭濁詩圖

御題王穀祥春雛得餉圖墨刻各一分具摺謝又覆 奏

被災各州縣衛明春正賑舉請加賑一月現於十一月二十二日赴宿州督賑分設十二廠以免擁擠守候計親給八千餘戶口二萬有餘各官分給亦俱認真無論城鄉遠近一律趕放旋赴靈璧泗州五河盱眙查辦如初又三次 奏報臘雪普霑俱奉

硃批欣慰覽之欽此頒到論語集解義疏一部 恩賞御書大福字鹿野雞次第具摺謝

乾隆五十六年辛亥

府君六十一歲正月奉

旨將被災貧民無分極次概行加賑一月其衛所飢口及貧生兵屬亦照正賑之例一體辦理其勘不成災之州縣酌借口糧籽種以資接濟欽此覆 奏臣去年散賑時將災戶原領賑票鈐印候 恩旨字樣仍發原戶領回收執以省另行查造散票之煩現飭藩司周樽馳赴各處查底冊對原票分廠按給又奏請和州安慶衛未完積欠南屯蘆課等項銀兩分限三年帶徵得

旨允行頒到

御製四得論續論墨刻一卷具摺謝三月二十八日奉

上諭朱珪奏二月分糧價單內開各屬價值與上月相同
絕無增減竟成印板文章著傳旨申飭覆奏上奉

硃批以後慎之欽此端午拜藥錠之 賜又頒到

御製墨雲室記墨刻一卷具摺謝又 奏學政秦潮考試

情形奉

硃批彼學問較汝何如尋覆 奏臣前後外任十數年不
免荒疎秦潮實翰林中之優者臣雖識見漸老而
秦潮學業方新臣亦不敢限其所至奉

硃批謙而能言得體欽此又 奏各屬秋收約八分有餘

惟鳳陽府屬之壽州鳳陽定遠鳳臺靈璧宿州穎

州府屬之亳州霍邱泗州屬之盱眙天長等十州
縣竝鳳陽長淮二衛低窪之區夏間雨水淹漫潤
後補種收成歉薄請將舊欠銀米緩徵得

旨允行九月頒賞鹿肉具摺謝二十二日赴祁門驗收
城工至歙縣新嶺有欲撫軍怒其令者賄掌亭人
以隔宿食進府君飽啖之去十月初二日旋省頒
到

欽定舊五代史四函

御題唐顏真卿書朱巨川告身墨刻一卷

御書大福字麇鹿野雞次第具摺謝

乾隆五十七年壬子

府君六十二歲正月頒到

御製正陽橋疏渠記墨刻一卷具摺謝又奉

恩旨鳳潁各屬被水處所亦加恩賞給籽種口糧其未完
民欠銀一萬五千兩全行豁免欽此三月初十日赴壽
州鳳臺抽查督給壽州被水處二十保鳳臺三十
四保先經登冊發票於適中處各設三廠先期撥
運本色以就貧民支領餘委司道府分路督辦二
十一日旋省奉到

特旨抄寄

御製圭瑁說措圭說復古說像說卜筮說五篇令閱看
又寄讀

御製反蘇軾超然臺記說皆恭跋進呈端午拜藥錠之
賜具摺謝七月請修臨淮鄉境西土壩埂一道添
建五孔石橋一座宜洩水勢需工料銀三千九百
餘兩奉

旨派山西巡撫長麟由驛前赴鳳陽會同朱珪確加履勘
尋同 奏十二口馳抵臨淮查出橋工經知縣墊
銀修竣前任巡撫何裕成批飭不准壩橋同時修
辦而壩在兩頭橋在中間勢難分辦且物料已齊

是以一律辦完又不敢據實申報臣珪實不知橋
座已修未將前撫錯謬更正復誤認尙未興工冒
珠具 奏蒙

聖明指斥實深惶悚請將所估三千九百餘兩加倍認罰
仍交部治罪 奏上下部議降一級調用奉
旨改爲從寬留任欽此八月頒到

御製回疆三十韻墨刻一卷具摺謝十一月奉到

御製十全記喇嘛說修德修刑論書隋文帝改元事文四
首令看具摺覆 奏奉

硃批詞過頌矣十二月頒到

御書大福字麕鹿野雞又

御製十全記墨刻一卷臺灣戰功圖一分次第具摺謝

乾隆五十八年癸丑

府君六十三歲元旦奉到

特賞玉如意一枝貂皮掛一件具摺謝十五日奉到

御製喇嘛說墨刻一卷覆奏略云火傳薪代旨異無生

因往果來報同眷屬豈真婆羅灌頂盡生甘蔗之家
阿賴飛精不越蓮花之種積私爲幻非信何行
奉

硃批確論然而時機曠而得辦非幸而何欽此二月頒到

御製書隋文帝改元事修德修刑論墨刻各一卷具摺謝

奉

硃批詞過頌矣欽此三月十一日奉

上諭無爲州永成圩江壩工程加築寬厚應將河形開挖取直用硃筆畫誌馬頭埂開挖河口寬三十丈深一丈五尺著交朱珪隨時親赴工所督率稽查無任官吏胥役藉端滋擾欽此四月四日馳抵履勘尋 奏遵

旨開引河一道迤長二百四十丈限一月竣築攔河壩使

河水由北東暢流而永成圩內可以涸出餘地帮

築裏壩以爲重門保障再由二沈家閘起至東圩

閘止開上河一道長十六里六分俾黃白二湖水
依王姥山麓而東約距江已遠數里徵之輿論皆
符但工程較大雖係紳士保護田廬出資捐辦若
經理不善不免官吏藉端侵肥無籍匪徒包攬勒
索利未興而弊先見不可不嚴加防杜奉

硃批是欽此端午拜藥錠之 賜十一日赴無爲州收工

尋 奏驗得張謝圩新修壩長二百餘丈永成圩
內遵

硃筆畫誌開引河一道計二百四十丈隨飭將上下河口
留驗土埂起椿挑挖臣駐河岸督催于十四日酉

刻開壘放水奔瀧下注雷吼渦旋至戌刻始定已
可通舟無礙仍于舊港內趕築攔河兩壩俾全河
湍趨新港而永成壩岸距溜已遠至上河十六里
六分工現在水漲農忙俟秋收水落開挖董事十
一人呈認狀掣籤分定里數段落諭令按段樹椿
屆期各濬各工以專責成不得苛派窮黎十七日
旋省二十日具摺請 覲奉

殊批汝係深知之人且不必來欽此頒到

恩賞庫紗一疋中秋後一日頒到

恩賞奶餅一匣九月朔頒到

御製福康安等奏西藏善後事宜詩誌顛末得四十韻墨

刻一卷

御製兵部奏凱旋兵丁至京由驛各歸本地營伍紀事墨

刻一卷十二日頒到

恩賞啤噤一件次第具摺謝又奏安慶池州太平廬州
鳳陽和州泗州六府州所屬竝建陽等衛田之濱
臨江湖淮泗者夏雨水發俱被淹浸無爲銅陵繁
昌地更低窪請將無爲賞借兩月口糧銅陵繁昌
借一月餘請分別展徵新舊賦及丁地南屯米麥
豆折蘆課津貼屯折借帑等項得

旨允行尋于十一月初旬赴銅陵繁昌無爲督放竝奏
開上河工程俾窮黎藉工就食又奏請春初分
別借給口糧奉

硃批新正有旨欽此又奉

上諭安徽省民欠二十八萬二千餘兩是否實欠在民欽
此覆奏原報未完銀二十八萬二千四百續完二
十二萬四千八百實欠在民者五萬七千六百有
奇十二月頒到

御書大福字麕鹿野雞又頒到

恩賞筆墨荷包金八寶金錢金錠奉

上諭朱珪進御製說經古文閱其後跋歷舉朕敬

天法

祖勤政愛民各大端見諸施設者與平日闡發經義實有
符合著諸皇子皇孫各繕寫一部頒設諸處以垂永久
朱珪能見其大跋語尤得體要著賞給筆墨等件以示
獎勵欽此尋具摺謝奉

硃批文實佳矣欽此是年五弟錫田卒于署命澍扶柩歸
葬

乾隆五十九年甲寅

府君六十四歲正月十五日頒到巡撫衙門通志

堂經解一部十九日頒到

欽定歷代職官表一部府君建

御書樓于節院廳事後之東偏貯之謝摺爲歛黃茂才採
代作丙午孝廉騰驥之子小門生也奉

硃批有章有本可謂能文明日兩司賀府君卽舉以告之
嘗與吳庶子蘊書云某生平于人代作之文如張
孟詞黃采臣皆形之吟咏著之集中一則不敢諒
人美一則不欲亂我真也又頒到

御筆四十二章經一冊

御製續纂秘殿珠林石渠寶笈墨刻一卷

御筆小行楷書墨刻十冊次第具摺謝二月二十五日赴
銅陵繁昌無爲督給加賞口糧詣上河勘工四月
再赴工查驗初七日開堰放水溜暢舟通請將該
州未完民借開河築壩積欠銀一萬五千餘兩於
秋後徵徵二年完繳端午拜藥錠之 賜又頒到
恩賞庫紗葛紗扇香筆墨奉

上諭朱珪進御製論史古文後跋以朕幾餘典學凡史冊
內有關政治者論斷折中見諸設施觀其文義典核著
賞給紗扇筆墨等件以示獎勵此冊並著皇子皇孫各
繕一部預備陳設欽此又頒到

御製筆誤識過墨刻一分俱具摺謝二十七日得

旨調補廣東巡撫速赴新任六月朔 奏交印起程赴粵

二十日到任八月初六日 奏入關辦理鄉試監

臨事奉

硃批此汝所長事耳欽此又夾片 奏三場搜檢先期出

示曉禁臨時仍認真搜查奉

硃批二語得要欽此二十六日 奏赴三水高要四會高

明等縣督放 賞借口糧修費銀兩九月頒到

御筆題秀起堂詩扇一柄庫紗織金大小荷包筆墨香器

等件奉

上諭朱珪進御製紀實詩十二函編排門類列敘按語具見用心審密所撰進書表文摛詞此事亦屬典核賞去御筆扇紗疋筆墨以獎其勵學欽此尋具摺謝奉

硃批太過頌矣又頒到

御製廓爾喀所貢象馬至京詩以誌事墨刻一卷具摺謝
十月 奏武闕外內場事竣十一月再赴高要等縣補放加兩倍 恩賞修費銀是年孫涂自皖歸京授室范氏庚子庶常光祿寺卿同邑諱鏊女光祿三先伯之壻也

乾隆六十年乙卯

府君六十五歲正月請 覲奉

硃批於八月間到熱河可也欽此奉

旨六十年元旦日食上元月食已普免天下應徵漕糧尚
有節年民欠及因災帶緩未完銀穀著各督撫查明速
行具奏到日降旨豁免欽此查粵東省未完銀七萬二
千餘兩米一萬九千餘石俱 奏明全免頒到

御筆大福字又

特賞鴛黃緞金線大小荷包三對穗子小荷包一個金八
寶金錢金錠一分筆硃錠等件奉

上諭朱珪進御製幾餘詩一部可謂用心細而措詞當但

表文按語俱有頌無規朱珪身任巡撫察吏安民是其
專責詞章乃係餘事除頒賞外著傳諭朱珪務須盡心
政務不可緩其所急欽此具摺謝奉

硃批近日爲逆苗匪犯之事實切焦急愧覽此辭耳欽此

二月頒到

御製熱河考墨刻一卷又奉

上諭朕臨御六十年八秩開五本年仲春親祭傳心殿臨
御經筵越三日釋奠文廟禮成臨幸辟雍閱視石經
碑刻連日舉行典禮御製詩四章用申仰止景行之意
茲新米珪學問尚優孫士毅亦嫻文義著將御製詩堂

抄寄閱看卽令恭和進呈欽此具摺謝竝恭和

元韻奉

硃批仍覺過頌詩留覽欽此又 旁批今日卽有慙愧之
旨見抄當知欽此奉

上諭長麟朱珪辦理盜案尚屬認真俱著交部議敘加一
級欽此具摺謝端午拜藥錠之 賜又奉

上諭兩廣總督印務著交朱珪兼署欽此又奉

上諭朱珪奏廣東閩二月分糧價有比上月較增一二分
者恐小民不無艱于糴食著查明應否將倉存穀石酌
量平糴認真妥辦據實覆奏欽此尋 奏青黃不接之

交糧價漸長已飭各屬平糶于四月奏三月分糧
價摺內具奏尋 奏各屬遞報開倉平糶酌借社
義倉穀兼以紳商義捐源源相繼奉

硃批欣慰覽之諒汝不爲飾詞也欽此奉

上諭都察院左都御史員缺著朱珪補授暫留巡撫任欽
此具摺謝尋以南海三水高要四會兩多端江水
漲 奏准借給兩月口糧緩徵額賦六月赴四縣
督放順道閱督標肇慶四會三水各營技藝分別
獎懲頒到安南戰圖一分又

御製歷年上元燈詞冊識語及福康安奏報大勦逆苗攻

解松桃之圖詩和琳奏報勦捕秀山苗匪詩墨刻各一
分又福康安和琳奏攻克黃瓜寨賊巢詩墨刻一
卷俱具摺謝十月奉

上諭兵部尚書員缺著朱珪補授仍留巡撫之任欽此具
摺謝十一月報道省晚稻收成分數奉

硃批亦可謂下豐矣又奉

上諭朱珪奏雨水糧價有較上月貴二分至七八分不等
者本年該省秋成尚屬豐稔何以轉有增昂是否市儉
預擡價值或地方官爲採買起見以便浮冒著朱珪留
心查察至民食有無妨礙亦著查明覆奏欽此尋 奏

潮州府雨少減收請將本年民欠緩徵廣肇惠三
府食指浩繁全藉西販流通潮嘉二府州接連閩
壤耕三漁七必資海運現在商販連檣而至潮屬
高田收成歉薄糧價是以增長似非市儈擡價已
停買補地方官亦不能浮冒現在糧價漸減于民
食無妨惟來歲青黃不接時南海三水高要四會
及潮屬各廳縣或需平糴及酌借口糧屆期察看
奏辦奉

硃批是不可諱災欽此十二月 奏喚信喇入貢使臣有
寄送總督海關監督禮物二分告以天朝大臣例

不與外夷交接奉

硃批此語是欽此又 奏司道暨各府考語摺云臣與各屬員講求吏治務期去奢從儉克已勤民近亦各知趨向無嚮浮縱恣之風奉

硃批兩語得之矣欽此又請將廣西省備東穀十萬石撥運回東以爲平糶酌借之用奉

硃批甚好欽此九月內

皇太子賞如意一枝 親佩荷包一對歲底頒到是年秋聞三伯父訃府君大慟復發咯血之症經月方愈

嘉慶元年丙辰

府君六十六歲正月頒到

御筆大福字鹿肉野雞具摺謝恭值

授

受禮成撰進詩冊差弁於二月初三日呈遞奉

上諭朕閱朱珪所進詩冊措詞冠冕得當其頌揚處不忘
箴規尚得大臣之體且二十五有韻內字面難押者居
多今用百韻成篇不致牽強是其學問素優殊堪獎勵
著賞給顧繡蟒袍大小荷包以示優眷欽此具摺謝奉
硃批覽但詞過頌矣邇日望雨望捷心不寧幾多率欽此

尋頒到乾隆

御定石經二百六冊四庫全書總目六卷又
御製宣諭建儲書事墨刻一卷竝具摺謝奉

上諭朱珪奏請撥廣西備東穀石以備儲糶前經奏通省
收成七分有餘節次奏糧價平減何以又須動撥廣西
備存穀石朱珪平日尚屬留心民事著卽將廣肇潮惠
等府現在民食是否足資接濟會否平糶據實具奏欽
此又奉

上諭朱珪奏到雨水糧價據稱各屬十二月俱得雨雪二
麥吐穗含苞商販穀船源源接濟且糧價較上月賤至

二分所奏非近粉飾則失於檢點前旣稱廣肇惠潮晚
收歉薄何以旬日有餘卽能穀石充裕朱珪平日尚能
留心民事不應自相矛盾若此著卽將兩次陳奏何以
互異糧價是否平減據實覆奏毋得再有隱飾欽此尋
奏上年潮屬春夏米貴各屬共平糶常平倉穀二十
三萬七百餘石秋雨又少潮州尤甚晚收遂歉採
買恐致穀貴倉貯不使久懸瞬屆青黃不接尤不
可不先事預籌是以請撥西省備東穀十萬石以
補平糶之缺以備緩急之需冬春雨澤頻濡糧價
竟未增長二月內晴雨適均三月初連得透雨實

屬從前願望所不敢必奉

孫批覽奏稍慰欽此奉

上諭現在剿辦苗匪廣東調陸路兵一萬名廣西調兵二千名前赴軍營著由六百里加緊諭令速辦欽此尋

奏得 旨後卽赴肇慶一帶竝赴廣西梧州境往來彈壓所有督撫提鎮各標兵十八起又北路三起西南路二起俱於二月二十五日至三月初十日全數出境又奉

上諭朱珪奏拏獲洋盜審明定擬二摺旣引立斬梟示之例而於文昌縣拏獲之犯僅將陳阿養一犯先行正法

其餘四犯及另案三犯皆擬斬決聽候部議以致往返稽遲未珪近日督緝洋匪屢獲多犯朕方喜得人曾加獎勵何以此二案辦理拘泥又不脫書生習氣著傳旨申飭欽此端午拜藥錠之 賜兵摺謝奉

硃批按例賞賚爾費心作此文乎欽此六月朔奉

旨補授兩廣總督兼署廣東巡撫欽此二十九日奉

旨未珪著來京另候簡用旋奉 廷寄以孫士毅病故大

學士出缺意欲以未珪補授但例須一月後方題未珪不必因有來京之旨心存疑慮欽此具摺謝奉

硃批此是前旨後因汝所辦艇匪事不安不勝朕恩屢有

旨足見朕用人無私耳欽此七月頒到

御筆再題彭元瑞所撰皇極殿燈聯詩墨刻一卷具摺謝

奉

硃批文固足觀欽此八月二十九日奉

上諭前因大學士缺出朱珪科分較深學問素優人亦端
謹是以降旨令其來京原欲將伊補授大學士乃節據
魁倫奏到粵東匪艇駛至閩浙洋面肆劫是朱珪於署
總督任內不能認真緝捕咎實難辭本當治以應得之
罪姑念其操守尚好前任安徽巡撫辦理尚無貽悞茲
特加恩降旨將朱珪仍補安徽巡撫欽此具摺謝九月

二十四日僚屬餞於猗園二十八日又餞於花塋
老弱送者盈路有詩日記取斯民原直道他時清
夢繞羊城皖人來迓者多又有句云粵人送我五
嶺北皖人迎我三水南十月二十七日接印 奏
鳳陽等六州縣水災經前撫 奏蒙

聖恩分別給賑竝予蠲緩現卽前往督放其勘不成災之
區一體緩徵復奉

諭垂詢明春青黃不接之時應否接濟欽此旋 奏請賞

借一月兩月口糧有差又 奏赴臨淮盱眙五河

泗州靈璧宿州督賑竣卽由潁州一帶查地方情

形及與豫省接界防範堵截事宜所過城鄉老幼
跪迎道旁諭以 皇恩浩蕩當教誨子孫守分安
業俱各歡呼聽受仍飭屬官勤民事惜民力果能
廉惠自愛百姓淳良者多頑黠者少無不可化頑
爲良也奉

硃批欣慰覽之不可始勤終怠欽此又奉

上諭吉慶奏緝捕洋匪設立章程俱合機宜朱珪等從未
見似此之奏著抄寄閱看竝將在粵時何以不照此章
程之處明白回奏欽此尋 奏臣兼署督篆審辦洋盜
粵閩夷匪同案同船者不少俱 奏明正法前督

臣長麟製米艇九十三隻分作東西中三路配足
兵械于冬令委員駕巡臣以米艇纜索桅篷日久
不能堅固趕修驗明連帮出洋此臣辦理之大略
也又夾片 奏臣於本年五月因調修出洋米艇
曾捐銀五千兩發兩司首府承辦茲請再捐養廉
一萬五千兩解交廣東藩庫爲隨時修理由奉

硃批覽欽此頒到

御筆大福字鹿肉野雞奏謝是年元旦 覃恩授光祿大
夫兵部尚書加一級先妣封一品夫人

嘉慶二年丁巳

府君六十七歲正月奉

上諭湖北被賊難民漸次歸業應給米銀賑卹江西安徽
二省各碾倉米六萬石解楚由五百里諭令知之欽此
尋 奏分起解運不致遲悞奉

硃批所辦好知道了欽此又 奏壽春鎮臣准河南光山
縣報稱賊匪在墨斗關保之販塘凹請撥兵防禦
已帶官兵六百名赴光州竝飭各營暗爲備兵九
百名以資接應臣查潁州屬均與豫省毗連飛飭
各官加意巡防所需標兵九百名妥速應付臣卽
乘往潁鳳督放口糧便巡查彈壓不致張皇奉

硃批是一切勉爲之欽此頒到

御筆虞書舜典集傳墨刻一件

御題張照書千字文墨刻一件具摺謝三月奉

上諭兵部尚書員缺著朱珪補授其安徽巡撫仍著兼攝
俟簡放有人到任後再行來京供職欽此具摺謝又

奏查放 賞借口糧情形順道巡查邊界于四月
初六日回省趕辦秋審事宜奉

硃批欣慰覽之欽此尋頒到

御筆匣行記墨刻端午拜藥錠之 賜俱具摺謝又 奏

遊

旨疏消宿州靈璧積水其合肥定遠巢縣來安全椒被旱
請分別借賑緩徵頒到

御製勒保奏報勦捕狎苗南龍圍解誌事詩奉

旨交朱珪閱看具摺謝九月奉

旨朱珪著調補吏部尚書仍暫留安徽巡撫俟簡放有人
再來京供職欽此具摺謝又 奏委藩司督放宿州等
處先行 恩賞一月本色口糧奉

硃批百姓情景如何仍資接濟否速奏來欽此尋 奏十
一月十八日赴合肥定遠盱眙五河泗州靈璧宿
州督放正賑各親放一二廠餘抽查現屆歲杪所

五言 卷中 三
有例領兩月三月賑銀同時竝放以免飢民守候
體察情形竟可不致凍餒逃亡奉

硃批好欽此十二月頒到

御筆自責詩墨刻一卷又

御筆授受禮成申示撰進頌冊諸臣諭

御筆校射詩墨刻各一分又

御筆大福字鹿肉野雞各件次第具摺謝是年閏六月錫
經自京赴皖趨省侍膝前四閱月蓋違侍者八年
矣署後有菜圃前撫軍滿洲托公庸署其亭曰菜
根香府君公事之暇啜園蔬課園丁種菜夏旱府

君齋心虔禱輒有雷雨間作至七月杪雨霑足九月下旬經拜辭回京府君重修黃閣河朱氏宗譜八卷刻成

嘉慶三年戊午

府君六十八歲奉

上諭本年京察屆期朱珪以尚書署理巡撫有年且學問尚優著交部議敘欽此 奏謝二月

皇帝幸國子監臨雍講學宣講御論府君進頌一篇
頌到

御論一本具摺謝又 奏三月十二日赴各屬督浚

年譜

卷中

三

恩賞口糧七月杪赴江寧監試九月奉

上諭睢州堤工漫水下游蒙亳被水村庄著朱珪督飭所屬妥爲撫卹無使一夫失所由六百里加緊又緊傳諭知之欽此尋 奏由江寧兼程回皖次日赴蒙亳查明渦黃驟漲日有增長各窪地漫淹甚重惟界溝集三十六村庄水勢較緩民已遷居高阜尚未損傷現率各員分投查核輕重酌量撫卹復奉

旨將亳州等七州縣竝鳳陽等三衛成災戶口按照分數于冬月給濟其勘不成災者緩徵尋 奏十一月十八日赴各屬查放正賑酌量本折兼放所有別項

三月賑糧仍同時竝放奉

硃批覽奏稍慰欽此是冬曾孫柟林生